


情境式演說

基礎篇 07

請共下面這四個圖，照順序組成完整的描述。

(會當盡量發揮，毋過四個圖攞愛講著。)



● 圖 1.

今仔日日頭赤炎炎，阿爸駛車載阮規家伙仔去海水浴場耍，雖然天氣燒烘烘，毋過我恰小妹一點仔都袂驚熱，顛倒足歡喜的。一下到位，阮就隨去換游泳衫，等袂赴欲從入去海水浴場耍水矣。

● 圖 2.

我恰小妹佇海沙埔耍甲笑哈哈，小妹用沙仔起一間厝，當我欲共呵咾的時，煞看著邊仔有空罐仔恰糞埽。「欸，哪會有遮爾濟糞埽，是啥人共糞埽烏白擲啊？」

● 圖 3.

全這個時陣，阿爸佇海裡泅水，泅甲一半煞雄雄看著有塑膠袋仔佇伊的頭前浮浮沉沉，害伊掣一趖，「哎喲喂啊，到底是啥人遮無公德心，共糞埽烏白擲？」繼落，就共塑膠袋仔拈起來，距上岸。

● 圖 4.

看著遮的糞埽，我吐大氣講：「無彩這海沙埔遮爾嬌，竟然有遮濟糞埽。」阿母就講：「無，咱來共糞埽拈拈咧，予海沙埔變清氣好無？」阮攏擰雙手贊成！這工阮佇海沙埔拈著幾若公斤的糞埽，雖然真忝，毋過看著海沙埔變甲嬌嗲嗲，拄才的辛苦就攏袂記了了矣。

評判提問

1. 佇路裡看著糞埽，你敢會主動共拈起來？是按怎？
2. 你平常時仔會按怎做環保？請你講看覓。

情境式演說

基礎篇 08

請共下面這四個圖，照順序組成完整的描述。

(會當盡量發揮，毋過四個圖攏愛講著。)



● 圖 1.

阿珠是一个真有才華的查某囡仔，伊會曉的代誌真濟，親像彈鋼琴。莫看伊這馬鋼琴彈甲削削叫，拄開始學鋼琴的時，伊嘛是拄著真濟撞突，險險仔就欲放棄矣，好佳哉老師共鼓勵，伊嘛真骨力練習，最後才有法度共鋼琴彈甲遮爾好。

● 圖 2.

除了彈鋼琴，伊的數學嘛真好，是佢彼班的數學小老師，同學若有問題就會去請教伊，毋管是啥物問題，伊攏真有耐心共佢回答，同學攏真恰意伊。

● 圖 3.

阿珠嘛真恰意唱歌，唱甲閣不止仔好聽呢。想袂到伊以早煞有一个外號叫做「走音天后」，雖然真愛唱歌，煞五音不全，定定予遐的聽伊唱歌的人笑甲反過，毋過這個外號無共伊拍倒，顛倒予伊閣較拍拚去學唱歌，最後就無人閣叫伊「走音天后」矣。

● 圖 4.

阿珠對棒球嘛足有研究的，伊平常時仔攏會去看人損球，佇邊仔做裁判，逐家攏真信任伊的判斷，甚至球員閣會恰伊討論損球的技術呢！阿珠講伊毋是天才，會曉遮濟代誌是因為伊願意學習，而且袂清彩講欲放棄，只要有心，逐个人攏會當親像伊按呢喔。

評判提問

1. 阿珠會遮爾有才華的原因是啥物？請你講看覓。
2. 你有啥物專長？這項專長是按怎培養的，請你講看覓。

情境式演說

基礎篇 09

請共下面這四個圖，照順序組成完整的描述。

(會當盡量發揮，毋過四個圖攏愛講著。)



● 圖 1.

這個禮拜，我綴阿母去果子擔買果子，阿母問我想欲食啥物，我講：「我上愛食柑仔，阿母，咱買寡柑仔好無？」阿母講：「好啊，按呢你共我鬥揀。」我隨應好。毋過看著彼規堆若柑仔山，我煞看甲愣去，頭家看我一粒頭兩粒大，就講：「阿弟仔，免煩惱，我來教你一个撇步。」

● 圖 2.

聽著頭家按呢講，我目睵攏金起來矣！「頭家，揀柑仔閣有撇步喔？」頭家講：「當然嘛有，你看像這粒的柑仔皮青青，食起來就較酸，啊這粒較黃，食起來就較甜，看你愛食佗一味，照這個撇步去揀就無毋著。」我聽甲耳仔覆覆，共頭家講：「原來是按呢，頭家，你真有學問呢！按呢，我愛食甜的，當然是揀黃皮的囉！」

● 圖 3.

最後，阿母買真濟果子，我嘛共揀好的柑仔提予阿母做伙結數，頭家講：「若食了好食閣來呢！」阿母講：「無問題，食好我一定鬥相報，紹介厝邊朋友來共你交關。」

● 圖 4.

欲走的時，頭家閣送我一粒蘋果，呵咾我足乖的。綴阿母來買果子真正是趁著矣！毋但有蘋果通食，閣學著揀柑仔的撇步，實在足讚的！

評判提問

1. 你敢有家己揀過果子？若有，你攏按怎揀？請你講看覓。
2. 你閣有聽過啥物揀果子的撇步？請你講看覓。